

長  
離  
閣  
集







長 離 閣 集

王 采 薇 撰

叢書集成初編

(補印本)

長 離 閣 集

一九三七年六月初版  
一九五九年十月補印

王 采 薇 撰

商務印書館出版

上海大眾文化印刷廠印刷

# 長離閣詩集序

曲阜孔廣森

昔靜女之三章。取彤管焉。被壽人於笙磬。非無都荔之詞。列緝宿于羲娥。不廢葦杭之怨。葛山少婦。執越布以歌勞。柘館貞嬪。裂齊紈而歎逝。書之硯北。盡金屋之奇才。選入江東。卽玉臺之新詠。女子善懷。香奩尙已。則有通華胄望。淑慎閨儀。南國新人。東家舊姓。十三織素。二七裁衣。漱潤蕤于瓜年。剡芳名于苕玉。長言婉婉。女師德象之篇。好句流連。吉甫清風之誦。前身蓮葉。不踐陳泥。他日椒花。必多新製。況復鴛鴦左顧。孔雀南飛。歸小婦之高堂。調弦錦瑟。識上頭之夫婿。絡轡青絲。鑪熏夕而共香。鏡照塵而同影。司空博物。本兒女之多情。內史工書。作夫人之弟子。斯又王郎天壤。愧此多能。居士桑榆。羨其嘉耦者也。若夫紅羅帳掩。朱鳥窗開。初成墮馬之妝。自服游龍之彩。繡餘茵苕。倦卽停鍼。製就茶奩。織常當戶。莫不語緣情靡。感與候遷。牙管一雙。金釭二等。雪凝謝苑。擬飛絮于風前。日出秦樓。歌條桑于陌上。至如雙聲讀曲。十索名題。陽羨新茶。袖書鬪罷。南安早栗。故事疏來。香沈水而郎歌。繭懸絲而妾和。西陵松柏。便結同心。北地焉支。彌增善睐。香囊叩叩。是繁椽之定情。雜珮珊珊。有鄭姬之驚夜。爰止爲歡。玉女爭投百箭之驍。射雉珠臯。始見三年之笑。又如草生南浦。梅下西洲。贈子將離。呼卿小別。菘藍盈匊。指五日以爲期。蕭艾懷人。比三秋而更遠。遺簪紹繚。破鏡連環。書檢六張。文周四角。蘭成集上。曾裁寄婦之言。徐淑詩中。不少望夫之什。亦或少君歸里。對挽鹿車。侯光去吳。仍偕鴻婦。漢水之平塗七百。江陵之遠道三千。春嶂青螺。

來發雙蛾之色。秋波白鷺迴成九曲之珠。是則七邑東征。曹家善賦。百泉舟楫。衛女寫憂。抑亦詩發乎情。情生于文者與。然而蓉生江上。杏倚雲邊。未免牢愁。誰能理遣。重以諸姬適邨。永歎肥泉。季娣歸鄆。先零弱歲。芝焚易感。蕙質何堪。幾日飛龍。祇愁藥店。數聲別鵠。忽上琴絲。簾塵則榻冷琉璃。吟筆則牀空翡翠。左思嬌女。能無失母之悲。班固佳甥。應有問神之作。於是子荆改服。文度多傷。求故劍于箱簾。綴遺翰于鏡檻。紅桃麗字。遂書河北之箋。白蠟妍辭。徧識閨中之媛。而或者謂結璘有藥。弄玉凝仙。三髻雲鬟。蓬壺已隔。層波羅轡。洛浦仍逢。倘作異聞。傳諸好事。則綢繆贈答。將皆戴勝之瑤觴。宛轉聲音。盡入彩鸞之唐韻。

閨閣而工吟咏。事之韻者也。綠窗名藁。伽音著集。風雅之家述焉。然大致不外賦草題花。抽青媲白。非必有驚人之句。超詣之作。鄭貞懿云。近世婦人女子作詩。率皆纖艷委靡。桐城方夫人云。偶爾識字。堆積齷齪。信手成篇。由斯以論。亶其然乎。余觀王孺人薇閣偶存詩。有異焉。其思幽以沉。其言超以雋。揚激楚之清音。役精空之妙手。蓋雖苦吟。雅宗之士有所不逮。可謂體絕香奩。才雄巾幗者已。聞孺人端麗明慧。熟漢晉書。工楷法。多才藝。顧年僅二十四而化去。屠氏湘靈。袁家君嫵。折玉埋香。古今同歎。其詩尙有二百餘首。尊人菽山先生索之未至。茲所見者。才三四十篇而已。菽山先生將以授梓。屬余爲點定。爰弁數言於簡端云。閩縣葉觀國。

序薇閣偶存詩草畢。復題長律一首。

容華刻玉氣吹蘭。細帙長隨鏡檻安。罷繡吟成藤紙貴。留香草在墨池寒。生天有籍宜叨利。住世無多似小鸞。若向詩家論格力。長江昌谷重登壇。罷繡吟。侯官女郎王虞鳳著。寄香草。合刻屠珩瑟沈天孫詩。

# 薇閣偶存弁言

閩縣何森林

東鄰黝女。爭傳賦茗之才。南國佳人。競做簪花之格。紫絲步障。時落譚鋒。青玉華軒。頻翻絮雪。鮮妍翰墨。居然衛氏夫人。英雋才華。允矣袁家學士。豈特釵鳳鏡鸞之句。妙著新妝。亦非香蘭醉草之吟。代傳白燭者也。觀薇閣偶存詩集。併讀小傳。知爲毘陵女士。姓王氏。名采薇。別字玉瑛。乃武進王明府。菰山老先生之第四女。句容廣文孫君書屏老先生之冢婦。而茂才孫淵如之德配也。靈慧夙成。岐嶷蚤異。蔡文姬六歲辨琴。徐惠娘八齡作賦。端莊靜一。不愧林下風姿。貞淑幽閒。羣仰閨中儒雅。誠所謂埽眉才子。當不徒刺繡神鍼。無何零陵道上。倏逢解脫之緣。女儿山頭。竟作飛昇之路。振珮環於天上。餘韻無聲。留詩卷於人間。靈膏不散。瓊鐙灰冷。三更好月空明。寶篆風微。一縷游絲竟去。掌天厨之九百。天地人寶藏兼司。檢月牘於三千。始中終夙根未斷。茅君西畔。夢訂後期。忉利東偏。詩傳前事。考月夕之分數。兼聽鴻溝。偵灰墮而遲留。空悲慧劫。絳河已杳。長居離恨之天。青鳥不來。永隔塵緣之路。聆鐘聲於闕下。蓬島宵分。洩露氣於宮中。瑤臺夜迴。五霞洞掩。已鞭鹿而逍遙。一足童來。枉焚香而睇視。觀流雲之黯黯。密緒千絲。聽珮玉之錚錚。芳魂百匝。靈雖長在。總杳杳而冥冥。見卽如初。亦生生而世世。語雖涉怪。事卻非誣。傳密思於仙娥。皆堪訂證。寄遙情于乩筆。孰語荒唐。願遺事之可傳。究仙蹤之莫挽。就使樂天長在。徒刊紫石之文。劇憐牛女云亡。空誦遺芳之稿。爰吟



短截聊當輓歌。謹撰弁言。用申哀誄云爾。

翡翠玻璃得所於絳仙。才調女相如。玉京難覓脩文客。珍重紅妝作校書。  
殿居忉利鬱巍峩。青鳥西來隔絳河。惆悵昆庭石公子。吹笙可處聽雲和。  
偶來塵世了前因。知是蓬壺第幾人。劫火灰殘天地老。白楊青草石磷磷。  
幻影過馳廿四春。瑤環莫認去來身。劇憐故國招魂地。曾否趨庭晤老親。

# 題辭

并序

三山張經邦

薇閣偶存者。毘陵王菽山先生第四女玉瑛女士遺草也。玉瑛不櫛書生。埽眉才子。楊盈川之女。少賦金釵。王內史之妻。幼工絮雪。性獨耽吟詠。手不釋夫篇章。鸚鵡硯中。罕點石州螺黛。鷓鴣香畔。恆攤蜀郡蠻箋。重以案側伯鸞。人間司馬。才真勁敵。歡比良朋。從枕上以論詩。直欲遠宗四傑。向花間而吮筆。非關頻埽雙蛾。意必探珠。音還憂玉。以庚庚之妙理。運乙乙之幽思。斯固慧勝文人。詣超巾幗者矣。詎意優曇一現。僅開頃刻之花。切利先歸。遂駕長離之鳳。芳園豆落。祇結相思。露井桃殘。竟成薄命。嗚呼。天閻難問。呼妙子以何從。仙路非遙。幸巫咸之可叩。爰憑青鳥。還寄素書。掌玉殿之縹緗。勝彼瑯嬛百架。降瑤天之咳唾。裁將金簡一函。密語深情。不數分釵擘盒。青天碧海。空懸夢雨。靈旗噫。王子登不踐紅塵。董雙成虛傳遠信。興思及此。厥痛何如。是以菽山先生。先一斑於梨棗。而淵如孫子。尙尋斷夢於稠桑。雖令方朔術窮。迷雲輿兮八極。尙冀劉生傳在。貽彤管以千秋。用敘長歌。聊充哀誄。祇慙禿穎。莫罄靈奇爾。

瑤光炯炯煥天章。散彩遙臨大道王。第一仙人同妙想。次三神女亞厄娘。珊瑚風度離仙闕。慧質明眸朗。秋月似吹芳氣作。蘭言疑隔冰牕見。香骨仙女昌容隔。愛緝細帙近簾裾。少小先工倒薤書。風味平連金翡翠。菱花移傍玉蟾蜍。更有清才薄柔靡。揮毫獨把鉛華洗。俊逸寧如罷繡險。精深真陋香奩體。詩成高唱

入層霄。露滿瑤臺奏六么。跛膝聲凝雙鳳管。參差音颯九鸞翹。夫婿由來亦仙客。碧虛宮裏曾偕謫。天台  
雄賦擲金聲。零雨清吟擘銀畫。階前唱和月痕斜。趙管風流未足誇。那知一夜飄蕭雨。落盡同心姊妹花。  
從此朱顏減歡思。投琴獨灑看花淚。孺人以悼姊致疾。花如人面不禁秋。流雲爲車鶴銜轡。用薇閣句。渺渺茫茫離  
恨天。水晶闕外住霞輶。反瓶覆水空悲咽。難寄桐君十幅箋。脈望薰殘檢書暇。鏘然風送仙音下。董雙成  
到步虛輕。一足童回寒漏罷。噫吁乎。上界真人游戲歸。祇餘荀令斷腸詩。願將別鶴離鸞曲。寫作芙蓉閨  
苑詞。

讀長離閣詩漫題卷末

儀徵阮元

青鐙涼涼夜如水。魂豔心香動殘紙。病意多從別後添。吟懷已在生前死。琉璃硯匣彩雲天。好事人間那  
得堅。玉臺空有傷神句。鏡裏宮花破不圓。

# 長離閣集目錄

長離閣集一卷詩七十一首詞一首

燕燕子飛

山中作

自君之出矣

山中憶吳如霞姊

復與季遠夜起視月同作

池上書寄薇隱

望夫石

香草河舟晚

曉步

夢遊

秋胡

蘭芝曲

華清曲

昆靈曲

前樓

句容齋舍

寒食吟

秋夜答季述

夢天

春眠曲

夏行曲

秋望曲

冬坐曲

木蘭詞

春暝曲

離居曲

霽行曲

病中憶歸效簡文卦名詩

曉起效徐陵體

早起憶弟婦

銅雀臺

不眠

曲渚

山空

雨夜

病臥得季述詩

送春

山夕

幻夢

初春

山夕

夢起步後園

半領和薇隱韻

舟次

有感

水宿

九月十四日舟由丹徒夜半與薇隱乘月登岸行三里作

寄薇隱次韻

山齋病起憶亡姊

答薇隱復次前韻

悼姊

寄季述時客和州

空室

山夕

蔣墅舟次和季述下第有

七夕悼姊

憶別和薇隱

晚立

二月十七日東薇隱

得薇隱從金陵寄一書

三月三日

夢起

寄父

空樓哭亡姊

春夕

秋夜不寐

哭姊

臥病

向夜

偶成

歸寧後尋亡姊故居

夢中作



又

幽夢

寄季述

回文

和薇隱韻醉花陰

附小傳

事狀

墓誌銘

# 長離閣集卷一

清 毘陵王采薇撰

燕燕于飛

流光何暉暉。暉暉亂春日。獨燕銜愁來。懸飛鏡池淥。池淥何多情。堂空復孤驚。羽豐離其窠。哺足辭所生。回身顧新侶。得食哀哀鳴。

山中作

夜松何濛濛。月小飛不起。知有抱瑟人。垂光碧簾底。露氣明曲巖。花光照虛夜。一片白雲聲。飛泉隔煙瀉。自君之出矣。

兩瘦不相識。炯心如流丹。掬贈焉可得。

山中憶吳如霞姊

帷鏡照宵衾。澗水聞夜室。天靜遠烟搖。華雲度流月。幽棲亦心好。思子方首疾。憶昨寄遠書。淒淒淚盈帙。生愁一何滋。少樂從是畢。虛房想清讌。蛾響落清瑟。何由寄新吟。慰我中似結。

復與季遠夜起視月同作

虛扉浹宵開。涼鏡照幽素。肅肅鴉不翻。團團雲稍去。蛩底聞行泉。箚黑辨浮露。外役于此捐。中疴自茲愈。循階桂華歇。交戶瓜蔓吐。徒乖有懷衷。未協長往趣。亦有同心人。斯情積難訴。

池上書寄薇隱

日暝幽眠涼。流雲漲巖曲。相思寄長風。動汝窗外竹。池頭孤行薄。羅冷卻憶把書雙。對茗受露衰荷散葉。香臨谿獨鳥。矜毛影。

望夫石

妾顏初如花。妾心已如石。定情雙妍姿。不忍君歸見衰色。妾顏當彫心不移。妾身亦化君始知。冰爲肌。草爲髮。山頭無人寄君信。妾意淺。君心深。恐君復化填海禽。冤禽來銜石方動。不作巫雲入君夢。

香草河舟晚

疎林無人葉飛影。暝渚歸帆貼空冷。斷岸泥多鴨爪痕。亂山鐘到鴉巢頂。鄰舟嫋嫋歌入烟。明月已讓星懸天。來風吹衣恐仙去。白道還疑翠微路。

曉步

曉色凝不來。鴉噉去何許。茶煙生溟溟。孤桃索人語。幽亭無人拓窗徧。一桁碧山低未見。日氣如爛。聚水心。雨光滿地流花片。

夢遊

一星迷濛遠谿路。出礙荒烟入橫霧。峽中泉氣冷逾秋。峯底天光碧疑曙。僊臆飛空蜀江小。露雨香挑覺春早。瓊樓貝闕搖靈瓏。衣翠霞紅各漂眇。流雲爲車鶴銜轡。心著游絲不堪繫。斷橋圍水水壓牆。雙燕爭

魂墮空砌。

秋胡曲

珂聲璫璫踏春疾。立處蘭風下林末。柔桑落臂弱不收。花頰流紅射朝日。冰縑夜斷不願金。妾淚自墮因  
耆簪。倉庚少婦能銷妒。磐石男兒不鎖心。

蘭芝曲

嗁鬢垂雲粉黃落。夜半嚴粧起幽閣。已分單棲似伯勞。劇憐薄命逢姑惡。紅桐掩墳秋骨灰。阿母淚落心  
當回。莫隨怨魄填波去。合化幽魂促織來。

華清曲

玉魚如冰冷犀齒。雪色靈禽作仙使。石扇龍鑲守別魂。不似蟾宮敞千里。蓬萊山高無落虹。釵盒夜泣翡  
綯空。雨零石磴荒夫草。網暗宮門縊女蟲。

昆靈曲

宮槐隴隴向清曙。蠹粉梁空燕無主。玉篴不動踏堂塵。簾底菱花學眉語。蟬絲細帳蟲織成。秋篔夜碧嗁  
潛英。翻翻小蜨隨裙幅。跡跡衰梧作履聲。

前樓

前樓交樹檐柯徧。後戶穿窗月輪見。樓空貯愁愁不升。飛露著鏡如吹鏡。長天無鴻斷來信。自禱夜風吹

夢近。一夕參差隔院聲。梨花飛白春人鬢。

句容齋舍

山鶯破曉第一聲。綠羅雨落如珠纓。連松猶合夜泉響。殘月不避晨光明。晨光朧朧逗深幕。開戶持書候空鶴。零雲一片吹不開。卻挂碧潭潭上閣。

寒食吟

花枝揚揚柳宛宛。不動陂塘水芹短。破冢孤梅掩骨深。敗牆小蜨尋魂遠。紅鮮綠穉隨春天。咽咽蜀禽飛不高。紙錢挂樹雨淋盡。滿地暝煙開鬼桃。

秋夜答季述

金鑪無香道書朽。隔枕秋聲下殘柳。瑣窗眉斂愁寄牋。懸夢已入浮雲邊。蕉廊風多獨吟處。落葉幽魂各來去。寒蟲一夜唳漸低。露白星黃共爭曙。

夢天

碧闌十二花無數。桂葉低籠若青霧。蕊宮誰遣別魂游。只有青禽送來去。波離扉薄不上關。對語月姊瓊樓閒。銀河珊瑚瀉聲小。手弄白雲天下曉。

春眠曲

篔稍壓戶簾紋細。空色湖光著山膩。鶯眠樹杪弄垂絲。蜨上花鬢醉芳氣。琉璃隔香香暗流。薇帳夢醒聞

輕鈎空闌盡日無人影。日炙落紅薦不收。

夏行曲

白波疊玉荷如錢。綃戶織月疑空煙。青蟲挑鬢受花露。丹鳥入幕棲芸編。疏桐垂陰下苔井。雨去新蟬一聲警。蘭堂夜靜還獨開。小玉眠涼抱枝影。

秋望曲

花梢凝霜散寒蛙。檐角垂絲挂零葉。南谿別處渚連空。瘦綠愁山照波濕。細煙青鎖雅尾長。淡日半入幽蟾黃。虛房未暝吹鐙坐。露眼風蹤弔曲廊。

冬坐曲

曲瓊押幔香絲起。酒波微皺夜及子。花蟬心朽不得仙。粉蛻空僵碎黃裏。風樞臃臃通月澤。屏外烏囓瘦林直。已罷懷人更憶親。冰紅淚落蘭膏碧。

木蘭詞

生男勿喜歡。生女勿悲酸。女生當縣弧。女足亦莫雙行纏。不見木蘭女。代爹征可汗。出門望行塵。日色青漫漫。顧笑諸少年。泣行胡郎切。何洑瀾。流塵凝雙眉。飛露綴兩肩。閨中何能貴。不及鐵衣錦。韉黃金鞍。閨中何能豪。不及銜霜度雪聽風湍。蛇矛丈八氣決前。精感白日昏沙煙。生還見天子。天子動色言。要金佩玉作織步。綽約顧影驚千官。上堂拜父母。父母疑重看。開簾覓我故時鏡。手脫長劍分雙鬢。君不見東家女

兒好顏色。朝貧穿鍼莫貧織。西家女兒衣盈箱。自矜嫁得金龜郎。男兒封侯妾何有。要取黃金自懸肘。

春暝曲

青楊分鬢下拋地。暝色春空綠膏膩。怨土成雲葬玉京。虛簾燕落相思淚。檐鈴細語春眠回。撲樹晚蜂嬌不歸。園扉斜開石泉冷。笛韻吹愁出苔井。黃月如星慘一鉤。杏花樓暗藏人影。

離居曲

露華網戶參差光。碧筠粉薄如棲霜。涼堂下簾簾翠地。素手無分玉如意。燔膏作鐙檐不紅。夕撫綠綺空窗中。一聲涼破楚天碧。去雁叫影思離鴻。南山點苔愁向曉。獨客腫腫涉長道。樓前月浪卷衣來。夢裏江聲隔帷小。

霽行曲

幽窗無人竹枝重。晴色風林散雅夢。曲沼圓文上薄冰。差差曉日魚吹動。黃編落枕愁獨眠。下階自惹花間煙。金蟾鎖春不得住。已入暗戶生苔錢。南雲沈沈雁慵度。鳳紙回文積篋蠹。已是春衫染淚來。亂紅更見鶻唳處。

病中憶歸效簡文卦名詩

雁小過樓迷。流雲復滿溪。蘿蒙纔上月。竹比已開扉。蠟照憐粧損。蟲吟識夢離。旅魂宵不定。革帶日仍移。病漸因霜痛。心恆似葉危。何時升畫閣。言歸妹把衣。

曉起效徐陵體

春鏡動春烟。春林綠半天。簾低壓枝卷。窗迴對禽眠。書帳蠅彈紙。琴牀風觸弦。辭衾惜香在。掃徑待花薦。研墨污羅袖。看魚落翠鈿。誰云厭長日。終是惜馳年。

早起憶弟婦

日華生曲沼。昨夢去東軒。露雨出深草。禽花雜一園。粧餘唯拂卷。繡裏更看山。護葉如長帶。蘋英似小鈿。何時話離恨。雙笑北堂前。

銅雀臺

日莫碧空杳。望窮如有存。雲癡想歌態。月轉見牀塵。草暗露凝跡。樹斜煙曳魂。此中君不起。何許泣能聞。可惜分香女。都無殉沒人。

不眠

不眠虛靜夜。憶別損清娛。月芒生鏡匣。露顆雜簾珠。徑壞轉鮮葉。巖寒尙碧蕪。息櫂唯旅燕。映樹有垂龜。夜夜梅枝下。迎寒減病軀。

曲渚

曲渚斜生白。疏星動欲昏。四更桃葉影。一縷杜鵑魂。斷雨還零砌。虛簾自打門。蕭蕭庭竹短。都作淚花痕。

山空



山空收夜氣。墟上露千星。嶺月流塵几。窗風亂道經。鶴隨雲到戶。蟲與葉棲亭。是夕懷蕭史。幽行徧綠汀。  
雨夜

響急衣砧合。聲沉漏箭隨。黛痕侵故壁。香影聚重帷。碧篔眠傷骨。紅鐙病壓眉。數株門外柳。苦伴暝禽垂。  
病臥得季速詩

病減無三日。春歸又隔年。能傳閉關句。來破擁衾眠。落雨時連蒂。喧禽不出煙。開簾放香篆。應始覺晴天。  
送春

如何送春處。不見有春歸。落雨絲闌住。殘花蝶鬪飛。黃驪正漂蕩。碧葉空參差。徒傷持桂酌。況復易裘衣。  
山夕

草蟲門徑遠。一路入谿煙。月滿無人地。鐘殘有雁天。心孤聞動竹。衣冷近流泉。欲覓鄉關夢。樓空獨上眠。  
幻夢

幾疊春山路。誰分碧扇開。露光生竹石。雲氣雜樓臺。鶴度涼潭去。鐘穿薄霧來。微茫天水闊。我夢正尋梅。  
初春

曉鏡慵梳飾。幽窗夢破遲。梅梁波反影。芸帙曙通曦。花逐調琴指。鶯隨入鏡枝。十分春欲去。惆悵未成詩。  
山夕

將暝室生白。松花滿石闌。碧潭琴影瘦。黃葉客衣單。網露迷蘭徑。茶煙惹竹竿。瓊枝空憶夢。挑飯不能餐。

夢起步後園

蘭香流一澗。桑烟染半岑。雨開殘照影。花動小樓陰。蜂晚能喧夢。塵凝不上琴。何時識芳草。眠裏定幽尋。

半嶺和薇隱韻

半嶺幽居好。疏談向夜分。劍明疑有月。香細欲生雲。新醞皆松朮。清娛有典墳。湘簾池上動。苦露濕行裙。

舟次

風斜舟近岸。竹外復蘆中。樹裏屏中綠。荷愁鏡浦紅。殘霞猶眇莽。出月已空濛。莫惜橫烟住。孤吟答露蟲。

有感

不見畫欂處。驚看過月痕。簾斜生鳥影。屏小貼花魂。鳳瑟埋塵冷。蛟綃濕淚溫。石牀苔掩鬢。黃蝶欲棲門。

水宿

冥冥堤畔路。草草別時家。碧影沈湖月。紅心上冢花。鐙微還下雁。鐘冷不驚鴉。薄醉和衣宿。扁舟入樹斜。

九月十四日舟由丹徒夜半與薇隱乘月登岸行三里作

幽行已三里。村落半攤扉。隻鳥時依樹。孤螢不上衣。月平人影小。潮定櫓聲稀。沿水星星火。歸鷺宿鷺飛。

寄薇隱次韻

春牖對芳林。朝陽上綺衾。戶低交葉暗。徑小受花深。金錯循離恨。瑤璫鎮別心。欲諳芳草路。因夢寄新陰。

山齋病起憶亡姊

澗響當宵定。嵐光入戶深。餘雲泛幽石。碎露滿疎林。竹院彈碁斷。松房沸藥聞。重泉埋玉客。誰識正思君。  
答薇隱復次前韻

香霧斜橫帳。衣綵重壓衾。夢聽曉鳥亂。愁與落花深。易盡千行札。難分一縷心。相如情若固。何用白頭吟。  
悼姊

殘夜一禽驚。鐙幽夢轉明。把書尋淚色。掩幔想衣聲。微病花全發。深眠月暗行。蜀絃塵裏斷。已任指尖生。  
寄季述時客和州

空院題詩對碧莎。華年作別歎蹉跎。夢餘捲帳人疑在。書去尋愁語轉多。曉岫入雲飛斷雁。夜鐙照雨落殘蛾。空江無復憐才客。此夕租船憶嘯歌。

空室

蠹壁蛛絲掩綠琴。碧苔紅葉拾遺簪。露寒花帶曉痕長。月小簾闌夢影深。條脫寸寬辭病臂。秋千伴遠繫春心。幽梅一樹還闕戶。似約幽人到綠岑。

山夕

碧簾不卷映風蘿。十日清愁獨抱疴。寒浦帶星垂似露。夜風吹月動如波。入樓葉趁人蹤斷。隔戶梅疑夢影過。莫更砧聲近空院。女類宿草徧墳科。

蔣墅舟次和季述下第有作

一夕霜花濕鬢青。湍聲出渚棹初停。病中龍具和衣泣。愁裏魚簫帶夢聽。隔浦葉多飛似鳥。入林鐘小遠于星。從君湖海幽尋志。何日浮家去杳冥。

七夕悼姊

窈果穿鍼聽曲街。瘦林斜月閣虛齋。愁年不共生年短。死日方知別日佳。風燭作花搖怨影。露螢隨淚墮孤懷。故牀鍼盒飄零在。望有吟魂到玉階。

憶別和薇隱

閣中羈客淚盈醪。湖上征人草染袍。小樹雨寒蜂去靜。亂花風壓燕銜高。幾年歎逝閒清笛。百日傷離閣彩毫。波影連天柳迷路。幽行惟有夢魂勞。

晚立

旋整羅衣候月斜。蕭然人影出晴紗。烟中紫燕相思語。霜裏紅蕖獨自花。住久小樓因對嶺。斷來清夢又無家。曲闌幽話何時展。一笛西風萬樹遮。

二月十七日柬薇隱

五日春陰不啓關。封書始此整幽鬟。離愁作霧疑沉水。曉病如烟盡著山。淚裏鏡開花四照。夢餘簾動燕孤還。錦囊自續新吟滿。何日憑欄與共刪。

得薇隱從金陵寄一書

尺幅吟牋照淚眸。半窗斜日夢孤舟。愁如天遠還窺帳。病與雲親不下樓。濕翠雨收侵硯匣。落紅風颭上簾鉤。青山到處應相憶。除是征人醉裏游。

三月三日

綠楊樓角帶棲鴉。欹枕鏹聲正憶家。吹夢夜風先到樹。弄愁寒雨不妨花。蟲依香影垂簾網。蛾怯晨光墮帳紗。我已離愁嬾春榭。徑泥何處又鳴車。

夢起

夢醒思家望翠微。幽苔染影上羅衣。寒天細竹人孤倚。斜日空檐燕對飛。碧嶺疊來鄉路斷。玉梅枯盡舊魂非。夜堂疎磬疑禪寂。冷水閒雲照合扉。

寄父

疎鐙殘雨計宵程。貧日偏傷遠別情。薄宦十年徒三黜。衰顏千里更孤征。飢猶勵學憐諸弟。弱未酬恩厭此生。一夜趨庭夢言笑。曉窗垂淚聽春鶯。

空樓哭亡姊

綠槐影裏露幽扉。寂寞樓頭落照微。此地獨來空繞樹。幾時別去更牽衣。風停虛幌神靈在。雨壞幽苔淚跡稀。誰語愁心向梁燕。故巢莫作一雙飛。

春夕

已罷讐書怨夕遙。更聞疎竹度鄰簫。靈璫鳥語驚簾押。寂寞香絲繞畫綃。一院露光團作雨。四山花影下如潮。傷離不爲何郎句。病久東陽自損腰。

秋夜不寐

獨掩幽窗臥不成。香心冷死粟肌生。五更霜月欺鐙影。一樹風鴉續雁聲。短草積烟歸夢怯。長林挂葉曉魂輕。鞠闌半曲還扶病。水玉簾間看啓明。

哭姊

斷甲遺琴委故牀。思君獨旦不成裝。花邊風起肩誰擁。月裏烟銷影更涼。殘墨尙明牋上淚。餘膏空落枕前香。翠屏一角淒歌哭。祗恐猿聞也斷腸。

臥病

漠漠凝塵掩鏡臺。藥烟如霧夢初回。扁魚影裏窺花盡。驚鵲林中覺月來。故里信疎拋舊翰。夜窗語冷見殘盃。長卿亦有懷鄉恨。百日青琴欲上苔。

向夜

樹影入清漢。蟬聲動小樓。凭闌弄清笛。微月在釵頭。

偶成

竹葉鳴紗牖。蟲聲雜錦梭。簾長鐙燄小。山亂月明多。

歸寧後尋亡姊故居

痛定猶開鏡。嗚多不整粧。紅苔黯空壁。飛電夜明房。

夢中作

欲眠疑將曙。涼春似早秋。青山獨歸處。花暗一層樓。

夢中作

草長蘭弄影。鶯語蝶飄魂。一畝淒淒水。斜陽卻在門。

幽夢

幽夢隨雲細細生。闌干經雨入流螢。夜堂獨自花迷影。碧漢風吹雁出城。

寄季述

嫩寒幃幙雨廉纖。衾上春衫逼曙添。試束晨妝拓幽閣。小紅齊見破煤尖。

回文

壁上蟲牋舊。鑪香近帳紗。石幽和瑟冷。衣薄引衾加。隔院過蜂蝶。分牕對竹花。席長橫帙亂。簾側挂枝斜。客思愁來晚。林空滿立鴉。

和薇隱韻

嘹唳歸鴻驚社後。旅館鄉心逗。夢入曉雲飛綠遍。天涯不認門前柳。露桃影裏人非舊。春也應難久。風

日又清明。獨對殘紅。寂寞簾垂晝。

右調  
醉花陰。





伯舅淵如先生配王夫人。才慧早世。曾刊薇閣偶存一卷。得詩詞雜著三十八首。畢秋帆尙書刊吳會英才集。復於伯舅雨粟樓詩後。附錄夫人詩。名長離閣集。較舊本增損不同。蓋選時各有去取耳。今年春。慶爲伯舅蒐輯遺集。自夏徂秋。編成付梓。將有中州之行。外舅南麓先生更屬編次長離閣集。乃以薇閣偶存。及吳會英才集所選者。互相校訂。合爲一編。凡詩詞雜著七十八首。附刊冶城遺集之後。袁簡齋太史爲夫人作墓志。稱其詩哀感頑豔。丁當清逸。王菽山先生爲作小傳。並摘佳句有寄父云。餓猶厲學。憐諸弟弱。未酬恩。厭此生。詠木蘭云。男兒封侯妾何有。要取黃金自懸肘。步月云。隻鳥時依樹。孤螢不上衣。秋夜云。五更霜月欺鐙影。一樹風鴉續雁聲。春陰云。離愁作霧疑沈水。曉病如煙盡著山。悼姊云。把書尋淚色。掩幔想衣聲。春夕云。一院露光團作雨。四山花影下如潮。七夕悼姊云。愁年不共生。年短。死日方知別日佳。舟次云。隔浦葉多飛似鳥。入林鐙小遠於星。有感一律云。不見畫釵處。驚看過月痕。簾斜生鳥影。屏小貼花魂。鳳瑟埋塵冷。鮫綃濕淚溫。石牀苔掩鬢。黃蜨欲棲門。皆已載入集中。又有感云。名香一縷當簾出。故札千函向月開。入夢已迷前度草。返魂惟有去年梅。惜首尾不全。集中未載。姑附錄於簡末焉。伯舅號季速。一號薇隱。茲編題內或稱季速。或稱薇隱。皆依原本。夫人喜讀漢晉書。尤工小楷。嘗見夫人爲伯舅手錄詩草一冊。絕似永興家法。因題句冊後云。手寫新詩墨細研。永興楷法尙依然。名山各有千秋業。偕老何須說百年。以誌景仰之誠。且紀實也。嘉慶戊寅秋七月。從子培龔慶謹識。



# 亡女王采薇小傳

亡女采薇。字玉瑛。余第四女也。其生母方娠時。夢月旁星光熠熠。或告曰。此四女星也。欲手摘之。倏不見矣。及生。姿質清弱。週晬病幾危。八歲許。同邑孫文學星衍女。旣長。貌端麗。性柔婉。耽文史。手不釋卷。尤工小楷。好吟咏。余以詩非女子所宜。遂祕之。雅愛潔靜。每明窗淨几。讀書臨帖。茗茗供花。翛然物外。時繙道家書。志神仙。余切戒之。則止。而夙根靈慧。時有出塵之思。性至孝。得嫡母白孺人歡心。迄於旣嫁。猶依戀不舍。待人接物。和順恭敬。余鍾愛之。每有拂抑。噴怒對之。輒解。人以爲吾家嬌女。雖大家左芬。不是過也。年十九。贅壻星衍於家。次年。壻補博士弟子員。壻聰穎。工詩。倜儻不羈。邑中時有毘陵才子之目。然頗恃才。不屑屑爲經生。吾伊態。或縱酒放歌。女數箴勸之。甲午。秋闈報罷。女頗抑鬱。從壻之句容官舍。舅姑俱稱美之。而女以乍離膝下。又值余三女適吳者暴亡。女悲慟欲絕。自顧孱弱。亦恐壽命不長。居常悒悒。乙未九月。生女阿靈。得嗽疾。體漸羸怯。丙申七月。歸寧。病益劇。竟于十月二十三日卒。距生癸酉九月十九日。得年二十有四。先是八九月間。余謁選都門。知女病。竊憂之。然以其貞靜閑淑。冀可不致夭折。自冬徂春。不得家書。心替亂。若有所失。今年二月初。得惡耗。計歿時。逾百日矣。壻已于十一月中。葬女于橫塘鄉新阡。余不獲撫棺一慟。情何能已。聞殮時。顏貌如生。手足溫軟。似解脫者。今年春。有能爲扶鸞術者。訛詞解女住。叨利東宮。掌上界書。並有寄外八絕。其事甚異。或有鬼物憑之耶。抑宿根之說。不盡荒唐耶。余自

庚寅歲適許之次女亡。甲午三女繼之。今四女又繼之。七年之內連喪三女。哀何如也。請明吳江葉太常天寥兩女昭齊。瓊章皆以才歿。太常作窈聞記傳其事。閱者哀之。余三女似昭。四女似瓊。近聞乩仙事又適相類。女所配既得才士。而天不永其年。奚忍令其湮沒無聞。與流螢落葉同歸澌盡也。歿後檢故笥得詩詞雜著若干首。付梓。伏冀大人先生矜其蹇薄。錫以輓誄。使幽泉弱息。得言而傳。則鄙人之哀亦以少釋云爾。武進王光燮菽山氏和淚筆於京邸。

# 誥贈夫人亡妻王氏事狀

夫人姓王氏。名采薇。父光燮。乾隆元年進士。宜黃縣知縣。贈奉政大夫。兵部主事。生母黃氏。第五人。姊三人。妹一人。一弟一妹同母生。夫人少以姿質端麗。尤爲父鍾愛。外舅之擇壻。必推年命當發科與否。或以予生年月日告。外舅推而善之。亟介戚好言姻事。時予生數齡。家君遠出。大母許通聘。以乾隆三十六年冬十二月。年十九。成婚于甥館。越四年。隨余歸句容學舍。四十一年。以疾歸寧。卒于十月二十三日。距生乾隆十八年。得年二十四。凡生二女。後皆殤。始外舅之在令廡。以文學飾吏治。不延幕僚。事皆辦。多燕閒。其教女一如教子。嘗自言吾女慧。或過于男。故夫人姊妹俱識字能書。既婚數日。夫人屬余填詞。並約圍碁。余皆未學。頗心媿之。後遂爲小詞酬夫人。而卒不能對弈。夫人終日持一編書。在室教其幼妹。時時臨帖。好虞永興楷法。或爲余錄詩。至今有存篋中者。嘗言唐五代詞。率可倚聲。被之簫管。春餘夜靜。輒取李後主簾外雨潺潺詞。按箏吹之。令余審聽。至流水落花人去也。天上人間。聞者欷歔。其後寫夫人遺影爲落花流水圖。以此旣歸。句容時余大母在堂。兩親愛子息無苛禮。定省之暇。不事鍼黹。夫人好絮除几席。余每陳書滿案而出。比入室。則夫人爲整齊之。偶得許氏說文。與余約日識數十字。久之。予遂通小學。山齋有桐。桂。古柏。冬寒月皎。對影蕭瑟。或出戶閒吟。或焚香開卷。論說史事。俱有神識。不信佛書。邪鬼之語。不視裨官小說。旣得疾。終夕嗽不止。又痛其姊先卒。自疑以產致疾。將不起。爲詩詞多淒楚音。有詞云。歸

夢到江南綠遍天涯。不認門前柳。又爲詩云。五更霜月欺燈影。一樹風雅續雁聲。余驚以爲不祥。乃起對落英歎曰。人常惜花早謝。紅顏出世不勝衰積耶。病甚急歸。母氏因送之。至里門。遂不起。臨歿。遺言勿厝棺佛寺。故余亟擇地鄉郡之橫塘鄉權葬焉。越十二年。余以翰林改官尙書比部郎。例贈宜人。及嘉慶元年。余出官山東。堯沂曹濟道。例贈恭人。皆請賫贈先世。今年以予官督糧道。加三級。贈夫人。夫人卒時。余曾爲事狀。年久失其稿。有袁太史爲夫人墓志。已屬梁侍講同書。寫刊于石。頃因整理家乘。復記憶遺事。撰次大概。以示後人云。孫星衍狀。

# 孫薇隱妻王孺人墓志銘

錢塘袁 妙

孫薇隱秀才。詩才俶詭。能爲昌谷玉川家數。予愛偉之。今春二月。以其亡妻王孺人事狀。及詩。索予銘。幽予讀其樂府諸篇。哀感頑豔。丁當清逸。故知完山之鳥。無異吭之鳴。雲和之笙。有雙瑄之奏。宛其死矣。士也。婆娑彤管。旣淹元石斯耀。謹按孺人姓王。名采薇。宜黃令光燮公女也。有天紹之麗姿。慍愉之修美。天女九相。靈芸三絕。年十九。歸秀才。秀才故食貧者。賦感昏時。以帛拜代香纓。孺人不槩于心。能鉏其色。守成湯嫁妹之誠。捐夏禹脩容之粉。調言筮巢味之器。治乾蓀饋食之籩。威姑以下。愉愉如也。每至玉女沙涼。金蟲鐙小。釵橫三鏡。髻妥半蟬。孺人焚衙溼之香。展排比之卷。或抽觴以啓顏。或論古而交謫。誦靈飛之篇目。王母心驚。成聲鑑之圖章。南海紙貴。秀才愛玩賢妻。有終焉之志。匪云嘉耦。直是吟朋。且其神識。尤異儕輩。嘗讀王章傳曰。牛衣妻自賢。柰沮仲卿上書。終是恇怯女兒。又對落英歎曰。人當如渠蚤謝。慮有憐者。何俟頽侵。才舍馭幹耶。味其言。直以形骸爲桎梏。晝夜爲一致。采雲留影。曇花愛空。宜其拂衣行矣。便登女媧之邱。執手奄然。難挽靈妃之步。病成解休。熊失嬾妍。卒年二十有四。秀才開華鎗之故匣。見都膚之舊痕。哀思夕流。憤泉朝涌。遂乃詣宛若。請神君。執鬼中。玩仙牒。知孺人故是兜率宮掌書者。雖跡涉幽渺。莊士不言。然浴義女于甘淵。奔純狐于月窟。乃自古記之。秀才鍾情語怪。以妄塞悲。當亦君子所不廢也。以丙申年十二月。葬常州府城東橫塘鄉之原。



銘曰

驚女鹿佑。楚客問天。緣何彼姝。以此名焉。宜其奄忽。離瑜復位。當景收蘭。臨華罷翠。悵悵孫楚。蟹行索妃。歌離弔夢。有涕漣漣。榛娥臺高。玻璃魂杳。定有青鸞。集此華表。